

L'an nòu
La chourmo de "Prouvènço d'aro" vous souvèton
uno galantouno bono annado 2024.



Prouvènço d'aro

Tóuti li mes, lou journau de la Prouvènço d'aro

Janvié de 2024

n° 405

2,50 €

L'enventaire de Prouvènço Frederi Mistral

La tresenco edicioun d'“*Uno annado, au autour*” de la Region Sud, un dispositiéu que met au lume li grândi figuro literàri qu'an marca lou Sud, après Jan Giono e Albert Camus, es Frederi Mistral que sara mes à l'ounour.

Renaud Muselier, Presidènt de la Region Sud lou presènto :
“Escrivan talentous, Foundadou dóu Felibrige, ardènt defensor de la



Prouvènço, de si tradicion, de sa lengo e de soun identita : se presènto plus Frederi Mistral ! Soun prèmi Nobel de literaturo en 1904 óufriguè à la lengo prouvençalo uno reconeissènço internaciounalo. Pèr soun obro literàri, meteguè en lume l'imaginàri e la pouèsió prouvençalo. En acò, fuguè l'enventaire de la Prouvènço. À l'òucasioun di 110 an de sa mort (1914), e dóu 170^{en} anniversàri de la creacioun dóu Felibrige, la Region Sud poudié que ié counsacra un vibrant oudenage.”

Dins la vido de Frederi Mistral, de-segur, poudèn ana de quatre en quatre coume lou bissèst e la chifro quatre counvèn encaro emai faguèsse de tèms :

- 170 an, lou 21 de mai **1854** Frederi Mistral foundo lou Felibrige à Font-Segugno.

- 160 an, lou 19 de mars **1864** lou Mèstre presido la Proumièro de l'Oupera de “Mirèio” au Teatre lirique dóu Castelet à Paris. Toujour à l'obro aviso que n'es au Cant desen de “Calendau”.

Annado Frederi Mistral



- 150 an, lou 18 de juliet **1874**, es nouma Chivalié de la Courouno d'Itàli, pèr li fèsto dóu cinquen centenàri de la mort de Petrarque à la Font de Vau-Cluso.

- 140 an, lou 25 de mai **1884** se capito de participa à la Santo-Estello de Scèus e fai dins l'encastre di Jo flourau soun bèu discours sus la lengo prouvençalo : “O Franço, maire Franço, laissez-íe dounc, à ta Prouvènço, à toun poulit Miejour, la lengo melicouso ounte te dis : Ma maire ! E pièi, à nosto lengo, qu'an parla nòsti rèire, que parlon eilavau ti païsan e ti marin, e ti sòudard e ti felibre, à nosto lengo de famiho, fai-íe dins tis escolo uno pichoto plaço au coustat dóu francès.” De mai aquest an “Nerto” vèn de parèisse e d'auvero lou Prèmi Vitet.

- 130 an, lou 11 d'avoust **1894** inaguro à Cadenet l'estatuo d'Andriéu Estienne, “*Lou Tambour d'Arcole*” e anara lou 21 de desèmbe assista à la proumièro representacioun de l'Oupera “*Calendau*” au Teatre dis Art à Rouan. De mai, aquest an se disíe qu'èro proupousa pèr l'Acadèmi franceso.

- 120 an, lou 4 d'abriéu **1904** sara à la Santo-Estello de Castèu-Nòu-de-Gadagno pèr festèja lou cinquantenàri de la creacioun dóu Felibrige, pièi lou 17 de novèmbre 1904 reçaupra lou Prèmi Nobel de literaturo.

- 110 an, lou 16 de mars **1914** coumpauso soun darnié pouèmo pèr la campano óuferto à la glèiso de Maiano e lou 23 de mars 1914 defunto dins soun oustau.

Adounc Frederi Miistral, autour de l'annado 2024, vai èstre festèja tant e mai en Region Sud.

Lou Felibrige, bèu proumié, anóuncio que vai tóuti li mes presenta uno videò en l'ounour dóu mèstre de Maiano, à coumença dóu 28 de janvié 2024.

La toco es de vulgarisa 12 sujèt en liame emé lou Felibrige.

Aquéli tèmo saran trata pèr *Les Jobastres*, Rouman Borelli, lou Marsihés, e Ugo Balique, lou Martegau, acoumpagna pèr chasco videò d'un felibre diferènt.

Pièi, tant lèu realisado, aquéli videò saran difusido en numerique sus li plato-formo di “Jobastres”, dóu Felibrige e de si partenàri. Bèn segur mancaren pas d'anóuncia tóuti li festiveta de l'an, à flour e à mesuro.

Despartido de J.-P. Tennevin

Lou grand proufessour,
Majourau dóu Felibrige,
nous a quita...

Pajo 9

La countagioun regionalisto

L'autounoumió óuferto à
la Corso adus un risque
pèr lis àutri region...

Pajo 2

Centenàri de Charloun Rieu

Restara lou mai poupu-
làri di pouèto cansounié
prouvençau...

Pajo 3